

Txirritola

ARAMAIO / Barikua / 2005eko uztailaren 22a / 160. zenbakia

KOORDINATZAILEA: Ubane Madera • Otorora Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Santi Kurutz Abadearen plaza eraldatu egingo da etorkizunean

UBANE MADERA

Herrirako aurreikusitako urbanizazio egitasmoen ondorioz, besteak beste, Santi Kurutz Abadearen plazaren eskuma aldean dagoen etxea eraitsi egingo dute, bota. Haren lekuan, Iturrosteko etxebizitzetarako bidea egitea da asmoa.

Ordenazioz kanpo dago argazkian ikusten duzuen etxe hori. Horren ondorioz, etorkizunean eraitsi egin behar dutela jakinarazi digute Udaletxetik.

Behin hori egin ostean, gero handik pasabidea egingo dute Iturrosten eraikiko dituzten etxebizitzetara joan-etorria egiteko.

Edozelan ere, oraindik guztia zehaztu barik dago. Hau da, oraindik ez dute egin etxea eraisteko proiekturik eta ondorioz, ez dago inolako datarik zehaztuta.

ALDAKETA GEHIAGO

Horrez gainera, herriaren sarrera ere dezente eraldatu da eta eraldatuko da azken hilabeteotan. Eraikitzen dabiltzan etxebizitzek eta haiekin batera egiten dabiltzan urbanizazio-lanek ematen diote itxura berritua.



Argazkiko etxe hori bota egingo dute, ordenazioz kanpo geratu delako.

Horrekin lotuta, aurrera begira aldaketa gehiago ere ikusiko ditugu han inguruan. Oraindik zehazteke dagoen arren, bada-biltza-eta kale hura Matxain kalearekin lotzeko dauden aukerak aztertzen. Dena dela, kasu horretan ere, ezer ere erabaki barik dute, oraingoz behintzat.

UDALETXEAN, LANAK BERRIRO

Eta Hirigintza kontuekin bukatzeko, hilabete gutxi barru, berriro ere lanak ikusiko ditugu Udaletxean. Izan ere, Diputazioak teilatua konpontzeko dirulaguntza onartu du bere Plan Foralean. Datorren urtean hasiko dira lanak egiten.

Oporretako istripuengatik odol beharrean dira

U.M.

Arabako Odol Bankukoek dei egiten diete herritarrei, odola emateko. Besteak beste, istripu gehiago izaten da sasoi horretan eta odol beharra handia da. Abuztuaren 3an Aramaion izango dira odol-ateratzeak egiten.

Ohi duten moduan, arratsaldean egingo dituzte odol-ateratzeak Aramaion, 16:30etik 20:30era, anbulatorioan.

Horrez gainera, aste berean Legutianon izango dira odola ateratzen eta uztailaren bukaeran eta abuztuaren hasieran, Fagorrek Arrasateko San Andres auzoan duen lantegian.

GASTEIZEN, EGUNERO

Horrekin batera, Arabako Odol Bankuko erizain Isabel Vitoriak gogora ekarri digunez, hitzordu horietara joan ezin direnek Gasteizko Santiago eta Txagorritxu ospitaletan eman dezakete odola; ia egun osoan dute horretarako aukera: Santiago erietxean, 09:00etatik 21:00ak arte, astegunean. Txagorritxu ospitalean, berriz, 08:00etatik 19:30ak arte astegunean, eta zapatuetan 08:30etik 14:30ak arte.

ISTRIPU GEHIAGO

Izan ere, abuztuko opor garaian, odolarekin "larri samar" ibiltzen direla jakinarazi dio Arrasate Irratiari Isabel Vitoriak; batetik, auto-istripu kopurua dezente handitu egiten delako, eta horrek odol beharra handitu egiten duelako. Eta bestetik, istripuez gainera, ospitaletan gaixo hematologikoak daudelako eta haiek egunero behar izaten dituztelako odolaren osagaiak. Eta gainera, emaile asko oporretan dagoelako.

ODOLAREN IRAUPEN TXIKIA

Hain zuzen ere, odolak duen arazoetako bat da ezin dela denbora luzean gorde, iraupen txikia duelako: "Odolak ez du asko irauten. Plaketek bost egun irauten dute eta globulu gorriek, berriz, 25 egun".

OPORRETARA JOAN AURRETIK

Horregatik guztiagatik, Arabako Odol Bankukoek eta oro har, Euskadiko Odol Bankukoek dei egiten diete herritarrei odola emateko: "Herritarrei gogorarazi nahi diegu denok behar izan dezakegula odolaren osagaien bat edozein momentutan. Beraz, ahal izanez gero, oporretara joan aurretik odola eman dezaten eskatu nahi diegu".

HERRITARRENHITZA/ Arantza Ibane • Langilea

Transgenikoak: kontsumitzaileon eskutik at

Heldu da jada ia danok urte osoan espero izaten dugun urteko sasoi, bai eguraldiagatik bai oporregatik. Batzuek gurago izango dute neguko hotza eta laneko errutina. Egia da bai, aurtan sekulako beroa egiten duela munduko gure bazter honetan. Baina pentsa dezagun negua ere hor ariko dela ate joka iraila pasatu bezain pronto, eta tira-tira, ahalik eta beranduena etor dadin gurako nuketik behintzat.

Udan oso ohikoa izaten da beroa dela eta ez dela, janariak eragindako gaitzak edukitzea salmonela, kasu. Zentzu horretan kontu handiz jokatu behar

izango dugu nahiz kontsumitzaileok nahiz ostalariek. Izan ere, ez da batere atsegina norabait joan eta horrelako zer edo zer gertatzea.

Elikagaien gainean ari naizela, kontsumitzaileon eskutik at dagoen zerbait etortzen zait burura ia beti: transgenikoaren auzia, hain zuzen.

Izan ere, ez gaude batere informatuak arlo horretan ene ustetan; autoritateek bestaldera begiratzen dute transgenikoei



"Atsedendaldi ederra izan dezazuen opa dizuet denoi"

dagokienean. Erosle xumeok, eta ez Greenpeace-ko beste talde ekologista baten jarraitzaileak, supermerkatuaren joaten garenean ez dakigu aukeratzeko dugun produktua natural-naturala edo transgenikoa den. Ez dakigu benetan zenbaterainokoa izan daitekeen kaltegarria gure

osasunerako eta baita gure ingurumenerako ere. Mundu osoko autoritateek eskuak garbitzen dituzte eta transgeni-

koek munduko goseari irtenbidea emango diotela diote. Jakina da, ordea, munduan dauden goseteak ez direla janari kopuruan oinarritzen gizarte okzidentalak eragindako injustizia sozialetan baino. Egia esan, orain mundu osoko gaitz guztien oinarria da hau, Londreseko atentatutik hasita. Hobe genuke, osasunaren arloan legetxe gizarte mailan ere sintomak estaltzera joan beharrean zuzenean sustraietara joko bagenu.

Uda hausnartzeko garai proposa dela jakinda, atsedendaldi ederra izan dezazuen opa dizuet danoi. Ondo-ondo izan!

LABUR

Abuztuko hitzorduen artean: Postal Lehiaketa

Txirritola Euskara Elkartek Postal Lehiaketa antolatu du. Parte hartzeko postal bat aukeratu, euskaraz berba batzuk ipini eta, honako helbidera bidali behar da: kultura etxea, Nardaga z/g. 01160, Aramaio. Irabazlea irailan aukeratu dute, eta sari moduan, bi pertsonandako landa-etxe batean asteburua oparitu dute. Bestalde, irailerako txalaparta ikastaroa antolatu dute. Eguna, lekua eta ordua jendearen arabera zehaztuko dute. Izena tabernetan eman behar da.

BOTEPRONTOAN/ Jon Ugarte · Herriak eta Mendiak agentziako kolaboratzailea

“Neguan Pirinioetan elurrarekin lotutako ikastaroak egiten ditut, eta udan Alpeetan ibiltzen naiz”

Oporrak datozela-eta, mendizaleendako proposamena egin digu Jon Ugartek. Besteak beste, Gipuzkoako Mendi Federazioko begiralea da orain dela hamar urtetik eta gidari lanak ere egiten ditu:

Norako proposamena duzu?
Gure proposamena da mendira joatea. Euskal Herrian aukera asko daude eta inguruan ere bai: Pirinioetan eta Picos-en. Eta beste aukera on bat eta horrenbeste ezagutzen ez dena da Alpeetara joatea. Automobiler egun batera dago, 1.000 kilometrorra, baina aukera zoragarriak eskaintzen ditu hilabete baterako. Oraingo autobideekin-eta, Aramaiotik Chamonix-era joatea 12 bat ordu dira.

Zela egiten dituzue bidaiek?
Gu beti joan izan gara gure kasa, autoz edo trenaz, Chamonixera. Eta Chamonix bakarrik ez. Alpeak oso handiak dira, Euskal Herria baino handiagoak; hortaz, han mendigune asko daude: Cervino-Monte Rosa aldera Oberland-Eigher inguruak... Kanpinean joateko eskaintza handia dago, karabanan joateko ere bai... Oso ondo dago. Eta badaude, baita ere, antolatutako bidaiek, agentziek-eta antolatutakoak: Nik daramat urte batzuk kolaboratzen Mendiak eta Herriak agentziarekin, Felipe Uriarte mendizaleak sortutako agentziarekin. Udan gidari moduan ibiltzen gara. Nik, normalean, udan bidaia bat edo bi egiten ditut. Aurten egokitu zait hiru aste egitea. Bestalde, Alpeek aukera piloa eskaintzen dute. Ibilaldiak egitea, adibidez. Esate baterako



“Azken uda hauek tontorrek egiteko ez dira izan hain onak, bero handiegia egin du-eta”

nik egin ditudan eta oso politak direnak dira: Mont Blancoko eta Monte Rosako tourrak. Dira zortzi eguneko ibilaldiak, motxila bizkarrean hartuta eta leku baten hasi, mendi osoari buelta eman eta zortzi egunen ondoren, leku berera bueltatu. Egin dudana ibilaldi politenetariko da. Joera izaten dugu mendi tontorrek egiteko, eta hori ere polita da,

“Mont Blancoko tourra egingo dugu abuztuaren 4-13an; joango gara 15 lagun, neu gidari”

baina hori baino politagoa da mendiari berari buelta ematea. Esaterako, Mont Blancokoan pasatzen zara Frantzia, Italia eta Suitzatik. Monte Rosakoan, Suitza eta Italiatik. Bailara batetik besterako aldaketak oso politak dira, mendiak ikaragarriak dira eta nahiz eta mendi bera etengabe ikusten joan, perspektibak asko aldatzen dira. Ibiltzeko errazak dira, mendi-

bideak, oso markatuta daude, nahiko jende ibiltzen da eta mendi-aterpeen aukera ona da. **Gainera, gidariekin doaz...** Bai. Jendeak bere kasa ere egin dezake. Baina gidari batek abantaila ematen dizu, esate baterako mendi-aterpea erreserbatzeko (abuztuan Alpeetan ez da horren erraza lekua aurkitzea) edo bidean eta inguruan dauden leku politenak aukeratzeko... Jendeari lagundu eta ibilbideko gauzarik interesgarrienak erakusten dizkiegu. **Baldintza bereziak behar dira halakoetara joateko?** Monte Rosako eta Mont Blancoko ibilaldiak egiteko, zapatila gogorak edo bota arinak besterik ez da behar. Pasatzen diren altuerak dira 2.600 metrokoak-edo, ez da glaziarrik-eta zapaltzen eta ez da inongo arriskurik. Nik lau urtean egin dut eta ez da sekula ezer pasatu. Arrisku bakarrak dira babak sortzea, orkatila okertzea... Beste kontu bat da mendian gora joatea: Mont Blanc, Cervino... Bakoitzak ikusi behar du zein maila duen eta zeintzuk diren egoerak. Esaterako, azken uda hauek tontorrek egiteko ez dira izan onak, bero handiegia egin du eta elur jausi arriskua, izotza jaustekoa... daude. Iraila da oso hilabete ona. Urtero Alpeetan jendea hiltzen da, baina normalean behar ez diren gauzak egiteagatik, esaterako, Mont Blanc igo beharra derrigor. **Zer egin behar da zuek antolatutako ibilaldietara joateko?** Gure taldeak itxita daude, baina Mendiak eta Herriak-en beti daude beste aukera batzuk: www.mendiaketaherriak.com.

TELEFONOJAKINGARRIAK

OSASUNA / LARRIALDIK	
Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Guruzte Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuziako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	
GASTEIZ	ARAMAIO	ARRASATE
08:15	07:50	08:05
	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabiliz gura badute, bezperan dituz behar dute honako zenbaki honetara: 629 54 59 23

OHARRAK

EGUAZTENEAN, OSOKO BILKURA EGINGO DUTE

Oporretara joan aurretik, azken osoko bilkura egingo du udalbatzarrak. Jakinarazi digutenez, bestelakoan artean, Haurreskolarekin lotutako proiektua landuko dute zinegotziek. Horrez gainera, musika ikasketekin eta eskolarako garraio zerbitzuarekin lotutako dirulaguntza banaketa egingo dute eta zenbait kultur elkartek egindako eskaerak aztertuko dituzte. Eta horrekin batera, Durako-Gain mendiko baso-erprobetxamendurekin lotutako lehiaketa irekia zabaltzea erabakiko dute, besteak beste. Betiko moduan, 18:00etan hasiko da batzarra.

OPORRETARA GOAZ

Guri ere iritsi zaigu oporretara joateko garaia. Eskuetan duzun hauxe izango da azkeneko alea. Dena dela, oporretatik bueltatzen zaretenerako geu hementxe izango gara, irailaren hasierako lehen alea preparatzen. Ordura arte, ondo ibili oporretan, edo behintzat, ahalik eta hobeen erprobetza itzazue.

Abuztuan, auzoz auzo, jairik jai ibiltzeko aukera

U.M.

Abuztuan hemen inguruan gelditzen direndako, herriko hiru auzok jaietan ibiltzeko aukera ematen dute: abuztu hasieran, Uribarrin San Esteban jaiak ospatuko dituzte eta Barajuenen eta Olaetan, berriz, Andramari jaietan murgilduko, abuztuaren erdialdean.

San Esteban jaiak abuztuaren 3an eta 4an izango dira. 3an, eguerdian meza eta gauean dantzaldia izango dituzte. Horrez gainera, Mus eta Briska Txapelketak hasiko dituzte. Abuztuaren 4an ere izango da meza eta karta-jokoaren finala jokatuko dute. Arratsaldean, berriz,

plater-tiroa izango da eta umeendako puzgarriak. Bukatzeko, gauean afaria egingo dute.

BARAJUENEN ETA OLAETAN

Abuztuaren erdialdean, Barajuenen eta Olaetan izango da jai. Barajuenen, besteak beste, meza izango da Andra Mari egunean eta umeendako jokoak eta karta-jokoak ere izango dira. Hurrengo egunean, besteak beste, meza eta auzotarren bazkari eta afaria izango dira.

Olaetan, berriz, hiru egunetako egitaraua prestatu dute. 15ean, besteak beste, 13:30ean, Andra Mari taldeak dantza saioa egingo du eta 18:00etan umeendako antzerkia izango da. 16an, emakumeen lanen erakusketa izango da eta 17:00etan Gardokiren musika.



Olaetan, 15ean hasi eta 17ra arte izango dituzte jaietako ekitaldiak.